

釣

磯

詩

集

序

吾邑邱鈞磯先生品著於宋末元初論定於昭代既  
列祀鄉先賢且配享紫陽書院矣八閩通志齒之儒  
林傳中以其會著四書日講易解疑書直講詩口義  
春秋通義禮記解經世書聲音既濟圖周禮補亡等  
書爲大有功經傳也然其書悉被元人取去今已無  
傳僅存者惟周禮補亡及其詩集耳學士家每用惋  
惜而要之先生所以取重千秋者不專在是南宋以  
後開闢來創見之變局也一時名縉紳委身從塵者

比比先生草茅士耳抗節不回壁立千仞辭聘一詩  
胸中斧鉞凜然終身以不挽江河爲恨死誠諸子勿  
治墳塋謂其心不與日月爭光可乎故老又傳先生  
遣一子隨張世傑入粵復讐焚腸非但託諸空言直  
見諸行事之實矣其子後飄泊瓊山遂占籍焉邛文  
莊公卽其裔也文莊評史每至春秋大義內外之防  
一篇之中三致意焉豈非有得於乃祖之訓而然耶  
夫爲學莫急於明理明理莫大於維倫先生倫完理  
愜行誼堪爲後世楷模卽不著書立言固足以俎豆

學宮而無愧矧其窮究天人洞徹性命晚年吟詠篇  
什實見其大槩又何必以諸書亡失爲先生致惜也  
通志不躋先生於道學而廁之儒林蓋猶有未盡之  
位置矣先生一抔土不立碑碣入國朝二百餘年無  
知之者萬曆年間或利其地形之勝遂指爲祖兆而  
爭之官爲勘驗劄地得誌銘乃加封而表識焉馬鬣  
巍然遂與先生魚磯俱後天地老矣先生不求身後  
名而名卒不可掩無意於徼天之報而天卒昌厥後  
士生世上其可不擇所以自處也哉周禮補亡今流

傳海內詩集則惟其家有寫本林子獲吾邑志節士也借得之喜而示余讀之苦多亥豕稍爲訂正脫簡則仍之擬俟他時梓行非徒表章吾邑人物亦欲使後學知所興起也近世小說家有移先生辭聘詩爲楊廉夫辭我聖祖之詩者子獲辯之甚詳議論痛快故當與先生並垂不朽云

庚子春下弦日同邑後學澹涪盧若騰手題於與耕堂

序

仰吉甫先生詩吾師盧牧州公論之備矣然霍所深  
慨者吾鄉士大夫當昔盛世以經學文章氣節稱不  
乏人未聞有搜先生遺集梓而傳之乃歷數百年而  
始有盧公序述焉豈非前人之失歟余嘗考閩之宋  
末韋布與先生同時者若鄭所南其先流寓姑蘓謝  
皋羽則遊浙水東西月泉吟社盛於四方惟先生隱  
在吾同海濱其地最僻間嘗步履不越溫陵本州耳  
呂樸鄉先生師也旣殉節於蒲壽庚之難呂所盤剋

秋圃先生友也呂之壽先生弟子也相與倡和不衰  
若浯江魏秀才則不知其名字建州熊勿齋卽偶爾  
之相逢其聲氣可謂寥落矣嗟乎先生爲宋諸生而  
遭易代有怪事天陰暮雨秋興諸作憤鬱無聊至於  
不欲生及其衰老尚有滿目乾坤都是恨頭毛白盡  
更愁吟之句歌之可以當泣焉計惟山水名勝同心  
好友可舒遣懷抱於十一耳而終身不出鄉國之外  
聲氣之寥落如此此余今日之嘆不知先生當年之  
所處何如也先生之遭易代年方三十有六至馬伯

庸與達魯花赤徵幣不出之詩次在八十有四吟之下可謂久幽不改其操矣曾子曰士不可以不宏毅任重而道遠若先生者豈非其人歟昔溫陵陳紫峯先生稱吾鄉文獻在宋出則有蘓子容處則有邛吉甫而瓊山仰文莊亦稱爲先生裔派惜也吾師盧公於是集苦多亥豕稍爲訂正擬俟時平梓行而竟騎箕尾歸天上不知此事當屬何人也噫



邱吉甫先生傳

邱先生名葵字吉甫同安人其家小磴嶼有釣磯因以自號先生丰神峻異鬚長徑尺補郡弟子員慨然慕朱紫陽之學嘗師呂大圭大圭師王昭復昭復師陳淳淳師文公故先生得其傳刻志自厲及見宋事日非絕意進取以耕釣養親而與呂肖翁號所盤爲友景炎元年先生三十六歲蒲壽庚以泉州叛降元幼主南航呂大圭遇害先生痛憤不欲生所爲詩歌憂悲恫切讀之能令壯氣豎髮亦可感泣沾襟晚年

知不可奈何始一意著書所著有四書曰講易解疑  
詩直講書口義春秋通義禮記解周禮補亡經世書  
聲音既濟圖得其傳者爲呂椿字之壽晉江人幼從  
先生學貧隱授徒詞賦敏捷亦著有春秋精義詩書  
直解禮記解後元遣御史馬伯庸來徵托種圃自匿  
已而率達魯花赤賫幣至家竟力辭伯庸悉取其書  
以去先生有詩曰皇帝書徵老秀才秀才懶下讀書  
臺張良本爲韓仇出黃石特因漢祚來太守枉勞堦  
下拜使臣空向日邊回牀頭一卷春秋筆斧鉞胸中

獨自裁因喻諸子曰昔周公孔子云云吾既不能挽  
江河以爲恨奈何受其牢籠哉吾老矣死之日慎勿  
治墳塋惟深藏地下勿爲人所識年九十以宋處士  
終

釣磯詩集目錄

一卷

五言古

七言古

二卷

五言律

三卷

七言律

四卷

五言絕

七言絕

五卷

警學遺

附

梅花賦

周禮全書序

呂大圭先生贊

訪邱鈞磯先生故居記

釣磯詩集卷一

宋同安郎 葵吉甫著

明 盧若騰閑之訂

林 霍子獲原本

童宗瑩淵若藏本

龍溪林國華樞北刻

五言古

同建陽熊退齋游九日山

八荒去求友名山在吾西雲石長掛眼云何不攀躋

攀躋有何求林木心所歡欣欣豈在木昔有秦隱君  
隱君天上去尚有姓名畱想當嘉遯時煮茗日唱酬  
唱酬者爲誰曰惟姜歐陽於昭忠與義追琢而成章  
成章匪摘藻一字不出山最後有致光亦復茲盤桓  
盤桓尚如昨人生幾陵谷至今荒祠下凜凜人如玉  
如玉復如玉千年仰高風誰哉共我遊建陽勿齋翁  
翁謂朱紫陽穆穆千載師昔年此游歷爰有妙句遺  
遺句尚可詠於焉且徜徉欲尋廊然處但見山蒼蒼  
蒼蒼未嘗歇誰識天機深未知後來者能復同此心

送熊退齋歸武夷

穆穆朱夫子於道集大成嗟予亦私淑與義終難明  
退齋獨何幸而乃同鄉生雖後百餘載立機若親承  
斯文幸未墜載道來桐城平生疑惑處喜得相考評  
秋風吹庭樹忽然作離聲吾儕各衰老何時重合弁  
願言且少住勿棄斯文盟聖賢千萬語只在知與行  
前修倘可企勗哉共修程

獨步芝山

平生獨往願頗得山林趣輕陰春漠漠澹日隨行屨



猶嫌影趁人特入深深處

溪橋看月

當空一明鏡團團水中見常恨溪頭風吹來皺水面  
水面皺猶可月碎成萬片

新晴

新晴登崕嶠欣此凍初解春風入條肄枯枿依然在  
有美北山薇良苗正堪採我欲攜短筐悠悠隔滄海

仰高堂外看山

半生勞仰止今日忽墮前如忘形骸友相對亦屹然

此心有全體動靜無塵緣  
遙睇層層碧羣仙室其巔  
我欲往從之於道恐未然  
但當安所止萬物同此天

自龍潭歸

策蹇下平崗挂帆渡安流  
平生不行險問道旋故丘  
高堂有鶴髮安敢事遠遊  
負米雖不多過冬亦稍優  
所愧無甘旨一飽良易謀  
兢兢保遺體無遺慈顏憂  
讀書茅簷下庶幾少愆尤

煮粥

清晨掃松葉旋復烘于燼  
汲井手自淅咄嗟香滿鬲

母子共一飽茅簷樂悵悵雖無滄瀆奉庶不愧此心

庚辰歲寓開元東羅漢閣

有美者傑閣淩然跨虛空有覺者彼岸廓然大圓通  
而我獨蠢蠢於何而適從

其二

有嶮者浮圖屹其挿穹昊有墳者古道淒其鞠成草  
而我獨競競於焉以終老

同景仁芝山賞梅

西風殺羣卉麋鹿覺悽愴野菊亦憔悴蕭條不堪賞

主人菴中梅的皪爲誰放當茲肅霜月數枝春盎盎  
真如得道人形槁神獨王

閉戶

自我來茲泮閉戶交遊絕經生一二輩長庚伴殘月  
芹藻自青青誰與共採擷唯於潑潑處見得源頭活

夜坐讀書

茅簷晚來雨東風忽吹晴不暖亦不寒夜氣覺自清  
書生澹無事復戀舊短檠開卷見聖賢愧我猶編氓  
便思澡塵慮肅然奉天明出門視斗極敬心由之生

姿年捨我去老學何由成

風雨中與呂之壽讀文公詩傳

泠泠葉上風瑟瑟簷頭雨

天分本無私人性皆相似譬之入山林斧斤隨所取  
姿年捨我去初心日以負勗君歲寒心保此棟樑具  
聖域廓悠悠脩途未容駐

觀赤石龍潭

參擾久不氏神物失所從嵌巖石壁下豈足爲龍宮  
亦有萬仞海茫茫與天通誰言汝爲智出入人鬼中

窮冬天地閉風雲未繇逢泠泠一掬溜於焉托孤蹤  
信兒有作依韻勉之

母鷄啄兒粟一啄還一呼細腰日祝子自憐族鰥孤  
賦形在穹壤此情誰獨無古來骨肉間愛深色自愉  
愧我無黃金貽以竹與蒲勉哉讀父書堯桀性不殊  
尋從子伯恭不遇

汲井欲灌園灌園當灌根澡身欲樹德樹德當樹淳  
我行獨踽踽聊復尋諸孫諸孫各有役誰復相溫存  
彼茁蒼汀蘆上有鷦鷯喧衡門可棲遲清風自妍暄

古愚兄戒食

有美者庭花謹母縱牛羊方苞亦方折其葉何辨糝  
敦篤哉吾兄一食不我忘有酒既醕我又以嘉穀將  
感兄此意厚起奉千年觴何以報佳惠作善天降祥

三月三十日

盎盎天地春萬物日和煦云胡生五穀不若草木數  
天地一小變六龍不行雨東皇詎忍歸田間已焦土  
人書生空自愁饑死者不恨特爲蒼生憂  
我願呼東皇爲我呼屏翳沛爲三日霖枯苗有生意

皇天青蕩蕩無繇訴衷情空怜汝布穀辛苦催人耕  
趙廷俊毀紫衣大德禪師祠詩以美之

風霆妙流行日月互出沒鬼神本良能一氣自伸屈  
南方有妖魂縑衣而血食因訟默祈呼桎梏脫頃刻  
逾廸會靡分唯事是凶譎吏有廷俊者謂此非正直  
宜加以鈇鉞而焚其宮室予聞而壯之作詩紀其實  
自從政教弛刑禍衆所怵憑依以爲奸白日成異物  
廷俊慎旃哉剛正乃終吉

跋巨然曉山圖



秋曙已生白朝暎尚潛紅是時天地氣正在貞元中  
千峯雖歷歷衆樹猶濛濛羣動又將作平秩一日東  
灑然人欲盡天理將昭融開窗自展玩妙處誰能窮  
七言古

七歌效杜陵體

景炎元年北人至撒花初令豪家備誰梲禍亂敷我  
民敲朴日煩無處避富者有銀猶可貧者無銀賣  
田地嗚呼一歌兮歌已哀天日不見惟陰霾

三宮北狩何時返猿啼鬼哭塵沙遠李陵耶律甘匪  
人豈無蔡琰吹胡管江南江北骨成山箭瘢紛紛劍  
痕滿嗚呼二歌兮歌未休潛然出滄滂沱流

三

山林嘯聚繁有徒州家買靜勤招呼縣官被命不敢  
遜麒麟出模羣狐孤昨者參州紅帕首高官厚祿恣  
狂圖嗚呼三歌兮歌三發天翻地覆綱常滅

四

督府養兵如養子帛堆其家粟崇庾少不如意出怨

言恃功偃蹇驕其主道旁老叢哭告予未被賊苦被  
軍苦嗚呼四歌兮歌始宣悲風爲我吹塵寰

五

富兒諧了西園價身看綠衣足誇詫那知又有價高  
人昨日新官今又罷近來書滿只月餘白頭老吏慵  
送迓嗚呼五歌兮歌未足末世由來多反覆

六

十家九室厨無煙兒夫仆後妻僵前米珠薪桂肉如  
玉野無青草飛鳥驚手持空券向何許官司有印儂

無錢嗚呼六歌兮歌愈悲天下太平竟何時

七

我生不辰逢亂離四方感感何所之欲登山兮有虎  
豹欲入海兮有蛟螭歸來歸來磨堯堅毋與蛟鬪兮  
毋交虎餓嗚呼七歌兮歌曲罷猿啼清晝蟲鳴夜

北山

朝見北山青暮見北山紫頑然土與石此色何處起  
無情草木含清輝朝露夕陽助明媚四時煙雨姿態  
異天機滾滾何曾已人見山上有青天誰知天在青

山裏欲問巨靈知不知白雲起處孤鳶飛

秋園桃花

秋園八月開桃花數枝冷澹無光華北風蕭蕭吹汝  
寒汝發非時誰復看墻下牽月顏色鮮故園欺汝相  
縈纏何不藏英待時發自有陽春二月天

次放翁梅花韻

冰崖雪谷物未芽造物破荒開此花神全形枯近有  
道意莊色正知無邪堅貞正要飽憂患放棄何遽愁  
幽遐移根上苑亦蚤計竹籬茅舍真吾家平生自嫌

亦自許妙處可識不可誇金尊翠杓未免俗篝燈爲  
試江南茶

禽言

春泥滑滑雨瀟瀟田婦力汲收墜樵歸來不敢道姑  
惡我自忘卻婆餅焦去年冬旱無麥熟阿婆餅焦難  
再得門前勿報穀公來竈冷樽空難接客阿兄提壺  
沽濁醪阿翁布穀披短簑不時脫卻布褲渡溪水只  
愁行不得哥哥

次韻吳靜能秦檜

故老相傳爲秦檜飛仙時立凍蛟背疑是當年丫髻  
人憑虛馭氣今安在百千年樹見栽時新承雨露人  
昭代托根南極殿下生巍巍直與天樞對紛紛牛馬  
已成塵露葉風枝今幾載是時鸞鳳一來栖臬孤不  
敢鳴妖怪一朝名字動至尊不見真形空粉繪多少  
黃冠盡白頭依神正直人再拜老榛何物敢干名直  
根惟有蘓仙愛方今南北同一天孤標不見貞元會  
李養吾董敎同安爲作長篇  
一元之根貞下起勾萌甲圻春陽敷千紅萬紫弄晴

霽忽然暗綠繞上墟霜風厲厲百物遂枝葉剥落留  
根株一誠通復心無愧雖千萬往猶褐夫浩然之氣  
非襲取所要與道與義俱勿正勿忘勿助長活潑潑  
地唯鳶魚子思喫緊爲人處鄒孟得之曰養吾千載  
斷脈無人續往往舐痔誇得車何期邑泮乃親見鐸  
音之來自方壺加之卿相心不動顧乃下教青衿徒  
古來揖遜三盃酒至和薰蒸遍八區聖門狂者得氣  
象童冠浴沂風舞雩嘆子養浩亦已久詩書窓前草  
不除明年春風二三月不知先生與黠無



金石錄卷之二十一  
懷古愚兄

紫帽之峯兮高且巍  
白雲一片兮空依依  
我有兄兮在海湄  
三月不見兮使我心悲

紫帽之峯兮高且嵒  
白雲一片兮空悠悠  
我有兄兮在海陬  
三月不見兮使我心憂

有荷荐香有竹荐涼  
歸哉歸哉一觥對床

卷之一終

釣磯詩集卷二

宋同安邱葵吉甫著

明 盧若騰閑之訂

林 霍子獲原本

童宗瑩淵若藏本

龍溪林國華樞北刻

五言律

泛舟

泛舟遊碧渚避世作漁翁試問千鍾祿何如一釣筒

雨添春後水帆漲晚來風  
緝捲看魚上停撓倚荻叢  
讀元次山詩有感而作

民病未蘓息誰爲元道州  
爭趨焚翁翁不念冷颼颼  
摧剝先蟲戶釜科及釣舟  
君門千萬里欲往訴無由

舟中避難

拏舟來避難別我釣魚磯  
帆卸遮春雨衣濡曬落暉  
南師聞韞走北馬逐人飛  
見說漳橋斷鑾輿曷日歸

哭呂樸鄉先生

樸鄉先生名大奎吉甫先生之師也以抗蒲壽庚遇害

已擬侍荷橐俄抽似葉身  
甘爲南地鬼不作北朝臣

屋壁遺文壞隣舟戰血新劫灰飛未盡碑碣託何人

又

潮士瞻韓木莆民愛召崇名隨天共遠身與國俱亡  
血碧一時恨汗青千載香玄虬方噴麝蟻蛭恣飛揚

又

斯文天何喪疑義有誰祛無復諄諄誘空令咄咄書  
秋風壇上木夜月墓邊廬每與諸孤道相看淚滿裾

端午

世亂逢端午淒涼弔古心空餘蒲曳綠不見黍包金

蛇壑橫人骨，鰲江絕鼓音。追思前日事，愁比海波深。

日入

日入川原暝，風悲草木枯。時逢迂孔氏，我自哭唐衢。  
市有虎求食，村無雞引雛。乾坤空納納，何處著吾軀。

田家

久旱割豐穰，羣童拾穗忙。早炊留客飯，新釀喚翁嘗。  
庭上萱箕滿，籬邊蔬甲長。腰鎌斫了木，準擬撈畝桑。

又

亂後無雞犬，昏時足蚋蚊。有翁如老鶴，感額說官軍。

埋穀爲春種鞭禾到夜分與兒再三話衣食在辛勤

又

片雲頭上黑凍雨自西來促婦收餘穀呼童拾爨柴  
堆禾披草蓋移菜傍畦栽却憶翁年老前邨醉未回

又

割餘田有鶴食罷案多蠅哀穀爲秋賚燃薪當夜燈  
老牛背穀觶農婦髻鬢髻應是無心問朝家廢與興

惡況

惡況有誰知僵妻與仆兒無人乞顏米有客泣楊岐

浩劫天難免凶年鬼亦饑但言身長在不敢恨流離

貧

相見盡言貧能貧得幾人文成休送鬼錢乏那通神  
形瘦何妨鶴衣懸一任鶉饑來眠仰屋鼻息撼梁塵  
瑞光亭有作

終年蕭寺裏人跡往來稀雀踏梁塵落蜂穿木屑飛  
佛幡書古褐僧壁掛禪衣此景惟予愛冷然契道機  
過江古愚兄送至渡口

茅屋亦云好萍蹤不自由看書猶凡上解纜已沙頭

白髮兄和弟清江夏亦秋相看不忍別斜日墜汀洲  
顏北城有約看梅徘徊花下

千林共搖落老樹獨蜿蜒玉立無人處黃昏欲雪天  
臨風脈脈倚竹靜娟娟身世寒香裏相看意已仙  
入忠軒書院詠蘭

堦庭根暫托只與綠苔親自少枝條分不爭花卉春  
經寒青瘦硬出堦紫鮮新風雨時吹洗含薰待主人  
與汝翔晚行

偶值忘形友田間步晚晴四圍山木合一片夕陽明



倚杖數歸翮隔溪聞喚聲行來僧寺歇又得問無生  
呈大 宗丞求筆戲

咄咄人誰識翩翩老更佳王維不是畫蘓晉已長齋  
地靜白生室天秋黃落堦日長用幽意咫尺到無懷

到郡城憶江釣

誰使入州府被人嫌我真未歸江上釣且作夢中人  
一片滄浪石百年泡幻身知心惟白鷺相憶伴經綸  
次呂之壽韻寄肯體

甚矣吾衰矣時然道亦然詩書輿脫輶歲月箭辭弦

所欠惟一死斯須便百年細思禽與犢等是食和眠

六月寓章法寺

暝色入招提昏鴉已不啼諸僧空院出老子獨山棲  
堂面無人北天形盡日西宋寥應不恨吾道與時睽

瑞光亭

昔聞石幢寺今見瑞光亭一水東南碧四榕冬夏青  
往來多俗子老病抱遺經親塚招提北回頭滄泗零

壽竹西

中秋八月朔人在竹之西講席朝齊聽吟寮夜獨棲

交情今管鮑清操古夷齊却笑苔磯老畏人頭愈低  
寄南劍詹野渡先生

聖賢已往古吾儕空自今六經尋斷脈千里遇知音  
莫笑因緣淺相期造道深可憐山海隔無路盍朋簪  
挽梁丹隱

受用伯陽書萬緣都覺虛達官真桎梏大厦即蘧蔭  
世謂求仙妄誰知是道餘臨終爲土解何必淚盈裾  
挽張樗堂

與君雖遠隔自少即相親老失同年友鄉無好善人

樗堂春絕迹蒿里暗傷神  
丹旆歸何處風霜故塚濱  
讀石隱淡吟藁

借師新藁讀睡曉不曾交  
壁月沈寒瀨琪花著老梢  
一吟三歎息雙字幾推敲  
曉雨驅炎熱僧窗得盡鈔  
寄陳儒正

論心纔暑夕握別已涼秋  
月照陳蕃榻風生王粲樓  
哀音盡外笛遠影鴈邊舟  
欲寫相思意題詩寄水流  
離相院

一夕僧留宿翛然萬慮空  
草分仙掌綠花發御袍紅

白鳥松梢雪立談麈尾風因悲人世  
上終日業塵中  
幽趣

幅巾簞竹下幽趣與僧同坐對忘憂  
草行歌解慍風  
鴨頭池水綠猩血石榴紅解作晴天  
雪松梢鷺一叢  
贈富公

師年過七十萬事總無心猿鳥窺禪  
性魚龍避梵音  
煙消香篆冷霜入鬢根深手種庵前  
樹蒼蒼十丈陰  
別城中親友

不堪離亂後重別舊交遊到處無青  
眼歸家空白頭

風霜秋一葉山水暮多愁後會知何日臨溪淚欲流

贈雲岫上人

諸生多晚出一老獨高年月照遺經匣雲生破衲褰  
苔深埋屐齒屋老帶松煙何日塵氛斷從師此話禪

書山翁房壁

山翁有山癖盡日對山青篲水晨煑茗爐香夜誦經  
雨畦蔬長甲風徑竹添丁獨有曾遊客清癯似鶴形

出院門閒步

出愛前村景歸穿薄暮煙鳥飛虛碧裏人在落紅邊

近晚山容淡新晴稻色鮮殷勤一溪水清到院門前  
偶成

風雨三間屋乾坤一腐儒營生妻笑拙學古客言迂  
坐久燈花落吟成硯水枯方書俱遍覽無藥可醫愚

白鷺

衆禽無此格玉立一間身清似叅禪客癯如辟穀人  
綠秧青草外枯葦敗荷濱口體猶相累終朝覓細鱗  
步院前溪

偶出山門去乘涼步淺沙溪流盤畧約岸沫上槎牙

野拓天圍大風吹日脚斜吟成無與語獨立數歸鴉  
倚杖

爲憐情景好倚杖立還移海近雲來溼波平日下遲  
歸牛行礫确幽鳥語淪漪覓句心將嘔傍人過不知  
過野塘用杜老韻

蛙浮成出字雨點作圓紋荷葉多於草炊煙遠似雲  
水清魚可數邨近鴨成羣何日營茅屋來茲避世紛  
月中與諸友還在沙溪

爲愛江頭月回環宿鷺汀露濃如潑水天澹欲無星



樹色依山黑螢光出竹青夜深幽興極瘦影自伶俜  
贈義上人

足跡遍天涯何年始出家去時雙不借歸日一袈裟  
有句堪題壁無魔敢散花至今清夜話猶自帶煙霞  
送陳判之邑庠

君去采芹藻那知事不同乾坤已新主禮樂尚儒宮  
雨過山仍綠春歸花盡紅悠悠聖門意千古獨清風  
寄林簿

一別又一載相思入夢頻以予生計拙知爾有時貧

鼠跡陶甌粟蛛絲范甌塵莫將憔悴意說與得時人  
送誼上人歸城

恰是聞師到持筇又欲歸去雲黏木屐飄葉泊禪衣  
不敢生離思應愁損道機故人如見問爲說志漁磯  
夜意

茅齋人語宋清坐獨巘岼有興憑詩遣無聊把劍看  
香殘金鴨冷膏盡玉蟲寒出見庭無月方知夜色闌  
曉意

鄰牕雞唱曉客路馬嘶風夜色鐘聲外晨光角韻中

蟾歸曳殘白鳥出浴新紅一點清明意那無保養功  
塵世

塵世無暇日偷閒到野亭橋陰界水綠燒迹斷山青  
石瘦牛磨角簷空雀墜翎暮笳風外急愁坐若爲聽  
孤客

綠綠竹生筍黃黃菜又花一年今已夏孤客未還家  
夜對青燈減朝看白髮加由來事筆硯不若藝桑麻  
雨後憶家

客裏詩書債人間骨肉情一春不相見四月又還經

梅雨年年事田禽夜夜聲直思到蒲節方得侍親庭  
早過後浦莊

秋晚邨莊憇青山對掩扉輕風隨步履殘露溼征衣  
水蒲菰蒲亂田荒鶴雀飛欲行還小立旅思重依依  
九日

海山秋索莫不見菊花開節與貧相棄年將老共催  
艱難思故里牢落對殘盃舊日登高伴今無一箇來  
歸侍

邨莊一罇酒誰與語悲辛衿佩空相負詩書不救貧

天寒負米客日暮倚門人遙睇長江水西風猶愴神  
病中

數日喉何哽三年肺未蘓自知愁不禁誰復問何如  
病體仍冬夜山莊獨老夫恐傷阿嬰意不敢寄家書  
龍湖道中

冬行緣底意倚杖陟高岡日色帶霜淡風聲過海狂  
林鴉山外黑野菜麥中黃臘月明朝是棲棲尚異鄉  
寄曾子方

別來俱不飲相憶若爲情交態忘貧富相知似弟兄

君殊非夙昔予亦負平生惟有子城月年年是舊盟  
題可翁塔

至人埋骨地草木總皆立未臘梅先覺無風竹亦禪  
燈緣千載燄名共四松傳舊日經行處瓶盂常儼然  
哭矩齋先生

蚤悟官爲崇晚將家付兒公今成佛去僕尚是人猗  
柿葉收遺墨梅花憶贈詩自嫌聞道晚有淚哭先師  
遊賢坂書贈可大

十月寒猶未幽人樂自便看山行覓句掃石坐談玄

一逕藤蘿月數家桑柘煙舊時釣魚處枯木倒寒泉  
雨後閒步

洗天風雨過炎暑漠然收偶爾出門去因之入寺遊  
僧畦瓜蔓長農圃貝花稠自笑生涯拙空餘兩鬢秋  
和北城友人

桐邊一葉地相望立秋風昔別已三載今來成兩翁  
醒初無異醉窮亦豈殊通卻笑甲辰一雌雄自不同  
題章法山房

四壁義文卦曾因學易居今來三十載只有一空廬

曉來含翠動窗明納太虛無人悟立理梅竹翠扶疎

寓龍湖莊

鶴髮重來客龍湖舊日莊鄉心忽搖曳春事又倉忙  
活活水泉動荒荒埜日長殘年厭聲利吾道在耕桑  
遊龍湖庵

一路埜花開春陰滿樹苔舊時僧已去前度客重來  
浮世年年變塵心事事灰跣趺清晝永元奘壁閒回  
和呂所盤韻

春豈關儂去愁緣老易生一邨俄綠暗數日又朱明



細切銀絲鱠新嘗玉版羹便令聞杜宇自不動鄉情  
支筇

天乎多往事老矣負初心病骨瘦又瘦愁詩吟復吟  
一生空碌碌萬綠自森森多少關情處支筇古樹陰  
寄呂之壽

一燈清夜話覺子頗真情世已無前輩予方畏後生  
天涯共流落歲晚獨無成桐下來春約飛鴻望寄聲  
入冬半月餘二麥未種忽然一雨

邨莊三日雨清曉怯憑欄灑地紛紛白隨風澄澄寒

不愁客衣薄且爲老農歡已有芄芄意來春歲計

### 乘除

若問乘除法須當健補貧如何窮到骨更有病纏身  
忽忽又將老蒼蒼更不神此生吾自斷山澤一癯人  
雨後有便价寄所盤

雨中正相憶偶爾有來鴻清况今何若新吟想漸工  
近聞惠連病似與長卿同何日蒼榕下開筵水面紅  
宿鏡山欲訪之壽忽聞東溟思仲至約爲南山  
之遊不果

鏡山欲相訪馬首已之東常日對衿佩此行如燕鷺  
將歸逢所與有約竟成空若到齋中日爲予傳主翁

和瓢齋菊花

東籬曾手種賴以制頽年白髮經秋別黃花入夢圓  
一場蜂蝶後老圃雪霜前不是耽幽隱淵明地自偏

秋夜

中夜愛親友欲別不勝愁此去無多日羈情不奈秋  
山寒猶碧樹水落正滄洲莫道非吾土今冬尚此留  
書陳氏小軒壁

一榻自徜徉悠然古意長地幽如佛舍軒小似船房  
萱草依堂綠荊花夾樹香我來訪幽隱話裏雨聲涼

寄槐庭

吾道付滄浪衰年尚異鄉畏人江草合懷舊暮雲長  
老我已無用如君終未忘天寒無過鴈夜夜獨鳴蜚

田間行樂

一年又朱夏殘生如白鷗未須愁熱去且得及清遊  
數點雨初下千溝水盡流誰家田萬頃綠到海西頭  
春日閒遊過石所山

盎盎春流水微微風動蘋江山一片石童冠兩三人  
落魄從渠笑逍遙得我真百年渾是客一月幾佳晨  
四月朔日曉起候之壽回家

清晨未巾櫛遠遠望山阿一夕已如此長年其奈何  
高齋空寂寞今日始清和可惜一尊酒驪駒又欲歌  
初夏

一信棟花風一年春事空池荷還揭揭櫻筍又怱怱  
空嘆時光換誰知造化工盡將枝上色弁作石榴紅  
次長卿韻

秋盡始相見宵殘卽語離將歸悲宋玉不飲愧袁絲  
送遠意未愜思家興頗隨可憐鏡山夜未與小盤期  
次韻長卿仍招爲桐下之遊

老懷原寂寞非子竟誰傾去矣無多日緬然相與情  
雲山留共往風雪渺孤征更解同行否無爲歲暮驚  
雨中宿章法院

瀟瀟一江雨涼氣入山扉離舍本不遠連朝亦忘歸  
紫荊成子落黑蟻化蛾飛看盡浮生事終輸破衲衣  
次呂之壽見憶韻

日暮客途客此情悲復悲  
栖栖吾老矣宋宗子何之  
跬步便相憶論心未有期  
江湖成底事空使素衣緇  
呂之壽詩到仍用前韻約爲五峯之游同訪老

人

客中枉佳句三復喜還悲  
冉冉歲暮矣悠悠思何之  
桐下不共往梅花預作期  
地爐風雪夜同訪五峯緇  
用前韻寄幾仲

丈夫語意豁不爲別腸悲  
有酒再醕我緣君二中之  
顧此風霜景闊哉牛女期  
梅花山館裏誰問敝衣緇

和顏北城梅花韻

白髮寒叢裏疎枝的爍明風霜半夜後南北一時晴  
冷淡吟邊景啁嘈夢裏聲園中幾許樹獨汝最關情  
離相院慙慙

一別已五載重來得舊朋秋風多敗葉童行半爲僧  
暫憩亦云好長遊愧未能前山久相識爲我碧崢嶸  
過李氏山房清坐對雨

千林同震慄一室淡虛明餘潤浮牕眼輕寒入鳥聲  
紛紛度隴白疊疊逼人清相坐焚香坐油然道氣生



壽蕭東海

樂哉東海老天與以遐齡前一輩人物爲諸生典型  
頭因嗜書白眼不要人青歲歲桑蓬旦人間活壽星  
對竹

此君無媚色耿耿合予衷外直形容瘦中虛忿慾空  
炎涼多變態瀟灑獨清風幸免斧斤患蒼然保令終  
新月

斗柄猶未西明生已自庚月光本端正人見有虧盈  
宗感此太極炎涼彼世情徘徊花影下獨自掩柴扃

貧病

貧與病相約貧來病亦來有僧時饋藥無鬼敢輸財  
酒債償仍欠醫書闔又開安貧吾自愛且遣病魔回

浮名

不起浮名想都緣耐宋家小齋坐聽雨野渡立看潮  
歲月吟邊過憂愁醉裏消早知書分淺悔不學漁樵

夜誦

夜誦琅琅罷山齋人跡無蟲聲助嘆息月影伴清癯  
黃卷十年子青燈一腐儒時危無用處我自笑非夫

浪出

浪出鬼挪揄歸來失故吾庭空榕落子人靜鳥呼雛  
潮退石自出天高日正晡寥寥誰與語懷古一長吁

養拙

養拙干戈際逃各山水邊疏泉妨蟻過掃地愜牛眠  
竟日雲籠樹何時雨洗天入門兒女聒恨未斷塵緣

慈濟行祠

上人棲息地況近佛莊嚴亂蘚緘新甃閒花覆古簷  
涪山青入眼榕樹紫垂髯獨步秋祠晚雲間月一鐮

哭高氏妹

寒月照幽閨眉多客裏齊飄零杜氏妹隱約伯鸞妻  
鳥啄有新哺鳳飛無故棲近聞猶子說憶汝萬行啼  
閒居

樹月紛紛白溪流練練清畦蔬先雨種徑草未春生  
井近通鄰汲橋崩斷客行閒居寂無事觴咏叙幽情

杜鵑花

望帝千年魄春山幾度風聲聲向誰白歲歲作花紅  
寂寞荒煙裏妖嬈細雨中可憐濺成血無復見蠶叢

錢侯寺

福唐錢氏子爵命古諸侯老樹護靈鎮神鴉迎客舟  
晨昏兩潮汐尸祝幾春秋參佐憑風景輕囂走不休  
悠悠

江上形容老竹間牕戶秋悠悠忘歲月落落少交游  
無食令兒瘦有詩銷客愁古今多少事易卷在牀頭  
龍湖觀人釣魚

野客雙蓬鬢溪童一釣竿得魚何與我對境自成歡  
日暮欲歸去支筇更一看淡紅千艸燭濃綠萬花盤

寄雪庭老子

問訊紫雲老何時立雪參生來將滿百空界直超三  
泡幻修千劫佛應同一龕曾蒙師印可立諦老方諳  
送元鼎學士

秋風甫聯騎朔雪又回車北道奇男子南遊行秘書  
碧幢留別句丹陛慶新除頭白逢昭代吾甘渭水漁  
贈曹貫之

一見如疇昔人文兩崛奇豪來無一世狂發有千詩  
浩氣乾坤塞修名臺省知就尋一勺水神物自應移

送舶司李郎中

朝家三尺法海舶一航風物到琛聲上人行浪屋中  
貨因拚命得廉故秉心公行李清如洗名應達陛楓  
秘藏院

纔入空門裏塵心便欲拋土花生石縫野蔓上林梢  
棟老蜂鑽穴簷低雀結巢僧中無賈島得句自推敲  
寄呈張教諭

天欲昌吾道君來董縣庠壇荒猶杏樹水落且芹香  
欲與二三子皈依數仞墻若爲鷗鷺伴留住水雲鄉

遊秘藏院呈老叟

法藏千年在何人結構功寒潭空夜月老檜易秋風  
我問四奇觀師云一切空因之悟真境只在太虛中

范掌書

出佐綉衣使八州人共歡一勾司范筆六計問周官  
鴈鷺手持進豺狼膽自寒豈惟重臺省風采動朝端

葉掌書

陽復天心動春回五葉中梅梢足生意栢府早清風  
身任八州寄手持三尺公可憐芹泮士空自獻詩筒



卷之二終